

欽定續文獻通考



欽定續文獻通考卷一百三十

兵考

教閱

宋甯宗慶元元年十一月命宰執大閱

二年三月命諸軍射鐵籠

嘉泰三年十月命兩淮諸州以仲冬教閱民兵萬弩手

四年四月命內外諸軍詳度純隊法

六月詔沿江四川軍師簡練軍實

開禧元年六月命諸路安撫司教閱禁軍 名臣奏議曰袁說友上言曰今日之所豫備者莫先於修軍政而軍政之最切者莫大於治軍實夫軍實者武藝軍徒器械是也臣嘗得之於宿將謂軍中如弓弩手如槍刀手皆有升加等則弩手之高强者則有四石與五石焉其用鐵搭者則加以三斗矣弓手之高强者則有二石五斗焉槍手之高强者則有五百六百檣者焉刀手之高强者則有格鬪屢勝者焉力愈強則斗力愈高矣必有此武藝則有此升加與之增食錢增衣賜所增多寡視其藝之高下統帥等日試月比每季屬之總領親與審擇從實升加升加既畢即請增給然後士伍激勸一遇征行莫非強勇之士今江蜀諸屯豈不知此而升加之法百不舉一臣又知其說矣軍中既無餘力總司復無餘財誠恐升加既多月支必廣既有犒設復添衣賜自度無以辦此不復敢事勸激遂使士卒有勇莫施有力莫見人材沈鬱緩急無用豈不深可惜哉臣愚欲望睿斷行下諸處統

帥將弓弩手槍刀手每日比試籍定斗力石力與糧數格鬪勝數最高強者候至一季取其最高者不限以人數多寡令總領同統帥親與審試不得徇情須從實升加犒設外照格增添請給各具名奏聞諸軍士卒自皆踴躍自奮願以勇力競相呈露一有邊警以此禦敵臣知所向無前矣

理宗寶慶元年十一月御射殿閱射藝遷補有差

二年六月御射殿閱諸班直射藝換授有差

嘉熙四年閏十二月閱軍頭司武技 淳祐四年董槐知建康府時軍政弛弗治乃爲賞三等以教射春秋教肄士卒坐作進退擊刺之技歲餘盡爲精兵

淳祐十一年十二月詔邊事未息武備當嚴諸路帥閫守臣講明激厲使各自衛鄉井弓弩箭隻聽從其便 時臺臣又條陳軍匠不閑閱習之弊按舊制禁兵毋私役比歲凡州軍屯營駐劄之處多循舊習每一州軍匠無慮數百工藝雖精擊刺不習設有小警何能授甲乞甲嚴帥守及統兵官應軍匠聽歸營伍閑習訓練勿競作無益虛糜廩稍以妨軍實

寶祐六年十二月詔廣南制置大使李曾伯城築關隘訓練民兵峒丁申嚴防遏

度宗咸淳元年八月命步帥陳奕沿江案閱軍防賜錢二十萬給用 至三年臣僚言諸軍統領統制正將副將正欲在軍訓練閑於武事一有調用令下卽行士悉將智將悉士勇所向無敵今江南州郡沿江制閫置帳前官專任營運不爲軍計實爲家謀絕戰無陣新功率從帳前升差大略一軍僅二三千而使臣至五六百以供雜役九年臣僚言比者招募軍兵一時徒取充數以覬賞格涅刺之後更不教閱主兵官苦以勞役日夜罔休一或稍

違卽罹圍擄掠之酷兵不堪命而死者逃者接踵也今請以新招軍分隸諸隊使之熟紀律習事藝或旬或月上各郡閱試蓋弊至於此而訓練之制大壞矣

遼太宗天顯三年正月閱北剋南剋兵籍及皮室伊喇摩哩三軍

四年十月幸諸營閱軍籍又以雲中郡縣未下大閱六軍

十二年二月詔諸部休養士卒七月詔諸部治甲兵

會同三年五月閱騎兵六月閱步卒均於南郊

七年閏十二月閱諸道軍於溫榆河

九年九月閱諸道兵於漁陽西聚林淀

聖宗統和元年十月將征高麗親閱東京留守耶律穆濟所總兵馬

四年十一月以南伐皇太后親閱輜重兵甲

十四年十月命劉遂教南京神武軍士劍法

興宗重熙四年十二月詔諸軍礮弩弓劍手以時閱習

十四年十二月觀漢軍習礮射擊劍

道宗壽隆元年九月詔西京礮人弩人教西北路漢軍

金太宗天會二年八月詔有司揀閱善射勇健之士以備宋

十年詔分遣呼沙呼等十二人閱諸路丁壯調赴軍

海陵正隆二年制戰陣之法十有餘條因大儼耀兵有飛龍騰蛟吼虎魚麗之變以示威武

世宗大定十年正月大閱於燕山之北五日而罷

二十二年三月命尙書省申勅西北路招討司勒明安穆昆官督部人習武備

七月集諸軍講武於宛平澤第賞有差

章宗明昌六年五月詔諸路明安穆昆農隙講武本路提刑司察其惰者罰之

泰和八年十一月御臨武殿試護衛

宣宗貞祐三年三月勅河東河北大名長貳官訓練隨處義兵鄰境有警責其救援 十月河東宣撫使胥鼎上

言臣所將義軍皆從來背本趨末勇猛兇悍盜竊亡命之徒苟無訓練統攝官以制之則朋黨聚植無所不至乞

許臣便宜置總領義軍使副及彈壓仍每五千人設訓練一員不惟預防閑使有畏忌且令武藝精熟人各爲用

從之

四年十月詔射生獵戶練習武藝 七月監察御史陳規上言昔周世宗嘗言兵貴精而不貴多百農夫不能養

一戰士奈何賸民脂膏養此無用之卒比者凡戰多敗非由兵少正以兵多而不分健懦故爲敵所乘懦者先奔

健者不能獨戰而遂潰此所以取敗也今莫若選差習兵公正之官將已籍軍人隨其所長而類試之其武藝出

衆者別作一軍量墾口糧時加訓練視等第而賞之如此則人人激厲爭効所長而衰懦者亦有可用之漸矣帝

不悅

元光二年四月遣官閱河南帥府見兵

哀宗天興二年八月闔兵於蔡州見山亭

十月闔射於子城中者賞賚有差

元世祖中統二年八月以宋降將王青為總管教武衛軍習射

至元五年三月敕阿里等諸軍前闔視軍籍

臣等謹按時與宋交兵故也

七年五月命樞密院闔實軍數

九年正月詔元帥府統軍司總管萬戶府闔實軍籍

七月闔大都京兆等處特默齊奴戶名籍

成宗大德二年正月遣使闔諸省兵

四年二月命李庭訓練各衛軍士

武宗至大四年九月時仁宗已即位命樞密院闔各省軍馬

十月敕諸衛漢軍練習武事

仁宗延祐元年十月以御史臺臣言命樞密院官設法教練士卒一應軍官襲職者必試以武事而後任之

七年十一月時英宗已即位遣使闔實各行省戍兵

英宗至治元年十月命樞密院遣官整視各郡兵馬

三年正月遣回回礮手萬戶赴汝甯新蔡遵世祖舊制教習礮法

泰定帝泰定二年八月遣奈瑪台簡閱邊兵 十一月御史臺臣言比年營繕以衛軍供役廢武事不講請遵世祖舊制教習五衛親軍以備扈從不報

四年二月詔同僉樞密院事雅克特穆爾教閱諸衛軍

明太祖洪武四年正月命魏國公徐達往北平宋國公馮勝往陝西衛國公鄧愈往襄陽各操練軍馬七月命徐達自北平往山西練兵

臣等謹按兵志言太祖起布衣策羣力取天下卽位後屢命元勳宿將分道練兵而其制未定此指洪武六年以前言之也考實錄及史概諸書癸卯年帝親閱武於鷄籠山乙巳年親閱將士習戰丁未年御戟門閱將士所以訓誡之者備切而自後六年正月徐達李文忠練兵山西北平十年正月梅思祖往濟南青州簡閱兵馬藍玉練兵東昌史不勝書而九年十月詔秦晉大王治兵鳳陽二十三年六月遣楊暉閱雲南九衛軍馬楊鎮閱貴州衛所軍馬二十四年五月漢衛大王練兵臨清蓋終洪武之世訓練未嘗少怠焉

六年正月定議教練軍士律 帝命中書省臣同大都督府御史臺六部議教練軍士律凡各衛所務以時練習騎卒必善馳及槍刀步兵必善弓弩及槍凡射以十二箭之半遠可到近可中者爲試中遠可到將士以一百六十步軍士以一百二十步近可中以五十步凡教以十二箭之五遠可到蹶張以八十步划車以一百五十步近

可中蹶張以四十步划車以六十步

會典內止云蹶張以八十步划車以六十步兵志本於會典故亦有脫去今從實錄

凡用槍以進退習熟爲試中在京

衛所以五千人爲率取五之一指揮以下等官更番率赴御前驗試餘以次番試在外都司衛所每衛五千人亦取五之一千戶以下等官更番率赴京師試驗餘以次番試所試軍士如步騎皆善將領各以能受賞否則軍士

給錢六百爲道里費將領自指揮使以下所統軍士三分至六分不中者次第奪俸七分以上次第降官至爲軍
正都指揮軍士四分以上不中者奪俸一年六分以上罷職

三月閱武於教場 王圻本曰初定鼎金陵置五軍營設大教場在都外小教場在皇城至永樂間設神機營在大

教場浦子口在大江嘉靖十四年設池河演武場在定遠縣時雖遷都於北而在南兵衛不廢且練習以時皆轄

於兵部及操江都御史蓋以重根本而飭江防云

十六年五月勅天下衛所上射者十選一更番赴京較閱 勅天下衛所於農隙以善射者十選其一更番赴京

較試以優劣爲千百戶賞罰至次年二月諭兵部以近邊將士既來恐城守空虛盜賊竊發令邊衛軍士較射止

就本衛不必赴京

十九年十一月詔陝西諸衛士著鐵甲馬軍赴京聽操

二十年閱武於午門外命將軍衛士日習射於丹墀

二十一年正月詔天下衛所軍士分班赴京較試武藝詔天下各都司衛所馬步軍士各分爲十班將弁以廢敘

久次升者統之冬月至京閱試凡操練務在弓必滿射必中角必勝有不如法及不閑習者罰指揮千百戶年深

慣戰及屯田者免試仍先下操練法於各衛俾遵行之

二十二年詔五軍府比試軍士分三等賞鈔 又各給鈔三錠爲路費不中者亦給之明年再試不如式軍移戍

雲南官謫從征總小旗降爲軍武臣子弟襲職試騎步射不中程令還衛署事與半俸二年後仍試如故者亦降

爲軍

成祖入立遣官閱視天下衛所官軍

臣等謹按永樂中每遣侯伯宿將出外操練簡閱皆如洪武時

永樂八年二月帝駐蹕興和大閱兵

臣等謹按兵志言成祖五駕北征六師嘗自較閱實錄於二十年二十一年皆備書之茲不詳述

十三年十一月勅諸守將及各都司諸衛選軍操練赴北京閱視 令諸衛所步騎兵遣將統領以明年春陝西

甘肅甯夏大同遼東諸守將及中都留守河南等都司徐宿等衛分駐真定德州操練俟赴北京閱視又勅周秦

肅晉四王選護衛軍五千赴真定操練又勅岷州西甯臨洮各衛選土軍舍人餘丁以明年春赴北京操練

臣等謹按實錄止言陝西甘肅官軍駐真定餘悉駐德州以地勢度之自陝西至遼東諸守將當皆駐真定也

二十二年十一月時仁宗已即位始命近畿諸衛官軍更番詣京師操練 帝因英國公張輔等言調直隸及近京軍番

上操備諭以畢農而來先農務遺歸既而輔言邊軍比悉放還京軍少請調山東河南中都淮揚諸衛校閱又勅

河南山東山西大甯及中都將領凡軍還取衣裝者以三月畢務七月至京老弱者選代官給之馬歲春秋番上

共十六萬人大甯七萬七百餘中都山東遞殺河南最少僅一萬四千有奇定爲例

臣等謹按大甯等四處所謂四都司之軍歲以班操至者也志又云後允成國公朱勇等請罷寧昌諸衛及隋文

千戶所班軍代以陝西內地卒山東衛士沿海備倭沿海衛士復內調通州衛士漕淮安粟安慶衛士赴京操不

便皆更之已并放還陝西班牙軍皆附書於仁宗時後面不詳載何年之制考之實錄及大政記諸書山東沿海通

州安慶諸軍以彼此不便互相代換之制則宣德五年尙書張本所請而從之者也陝西緣邊衛所以陝西內地

衛所官軍代換則亦係同時張本所請志言朱勇等請當是勇與本同建議也至志曰已并放還陝西班軍考實錄宣德八年兵部議以陝西兩班赴京操備官軍五千九百六十人分三班更代常留二班在衛守備從之至宣德十年英宗初卽位實錄又言尙書王驥及張輔等議以陝西西北俱臨邊境宜遣還官軍各守分地其腹裏衛分仍更番赴京操備遂遣陝西邊衛班軍俱還原衛蓋止就邊徼者言之並非陝西全省之軍皆放還也兵志中略而不詳故備核之

宣宗宣德三年四月命各都司摘選屬衛精銳軍士專一操備

五年十月帝巡宣府駐蹕洗馬林閱兵

英宗正統三年二月闕安定門外地爲教場

六年閏十一月操練陝西下班官軍 時命會官議陝西邊務兵部尙書楊士奇等言陝西更番操備官軍率一年一更其下班者恐有疎縱遇警難以調用因詔以每歲九月中至正月終三日一操餘月令其休息

十四年二月令神機營練習刀牌 鎮遠侯顧興祖言神機營操練槍銃俱係火器恐遇風雨或敵人猝至必致誤事宜每隊添設長牌五面長刀五把於前斫馬脚遮弓矢乞於幼軍內撥六千名操習聽調從之

景帝景泰元年六月大同總兵官郭登上操軍法 登上言大同東西二路各有參將操守其本處並河南山西調來操備軍選年力精壯拽弓六十斤以上者爲頭撥當先破敵餘者爲二撥每隊白牌一面通寫五十人姓名以憑試驗點開五人各帶小圓牌一面互寫五人姓名背刻軍令一人有功五人同功一人退縮五人同罪每五百騎委都指揮一員管領使功無相撓責有所歸帝善而從之

臣等謹按兵法以伍爲要故校士之法莫先於東伍王圻本言靖遠伯王驥守備南京嘗閱師覆舟山問其將校曰部伍行列若何皆對曰隊各五十人始爲一字列聞鐘鼓聲則變而爲方員直斜之勢今日所校練是也驥笑曰如此何以約束士卒俾就紀律哉凡兵五人爲伍必一人居中執旗標四人者立四面皆聽一人所使中一人恆堅立不動赴敵則四人必聽中一人使四人者相顧應四人死中一人不得獨生由五人爲二十五人共一隊最中一人執旗稍大以令其四面如前五人之法又倍而成伍則爲一百二十五人其再倍則爲二百五十人共一營左右前後相應而聽於中以一百二十五人五分之一居中四者寄四隅爲遊兵出奇而正兵二十五人堅駐不動一相犄角而功可成矣又以五營如前分布之則正兵一千二百五十人而又以一千二百五十人如前法爲奇兵遊擊則總二千五百人爲一帥相機調遣聽於中軍主將之令其下由伍而隊而營各有一人爲中中者一人各以將之令其餘如是豈有紀律不嚴約束不齊而功可成者哉聞者皆稱善厥後戚繼光之練兵尤爲詳備見於所著諸書

二年十一月揀選在京官軍子姪補伍操練 時得軍舍人等二十七萬餘名命選取補伍操練

十二月選官軍十萬分五營團操次年遂立團營 土木之難京軍沒幾盡帝詔議戰守方略于謙等言兵之所

賴者將得其人則兵無不精臣等議選官軍十萬分五營團操每隊五十人一人管隊兩隊置領隊官一員每

千人把總官一員至五千人置把總都指揮一員各量其才器謀勇授之使之互相統屬兵將相識如遇操練之

時量調一隊或三五隊點閱比較武藝量爲勸懲使管軍者知軍士之強弱爲軍者知將帥之號令不致臨期錯

亂難於調遣合則爲一營分則爲五營萬一寇犯賊多則各營俱動賊少或分調一二營或調一萬或三五千隨

機應敵其平日選大小該管頭目已定則交戰之時多用則多調少用則少調止調該管頭目而士卒自隨平日相處既久同輩之人易以相救管隊之人易以使令比之向日混同操練不辨強弱不知號令者不同除團營之外別選精壯以備緩急調用從之三年十二月于謙石亨等議選各營精銳官軍十五萬分爲十營每營置坐營都督一員號頭官一員都指揮二員把總十員領隊一百管隊二百於三營提督中推一人充總兵官監以內臣兵部尚書或都御史一人爲提督其餘官軍仍歸三大營各委頭目於本營訓練守備京師名曰老家京軍之制一變

臣等謹按明自宣德以來承平日久將帥怠惰戎伍空缺及土木之役京營戎馬喪失殆盡而兵不可問矣景帝嗣位專任于謙既却瓦剌復車駕於是整飭戎政而京軍之制一變團營之法以十五萬之衆合之爲一分之爲十自一營以至一隊兵將相習自一隊以至一營體制相維所以得京軍之實用而所向有功至三大營雖爲老家未嘗不加之操練以備緩急厥後不求立法之實乃復於團營中選拔訓練是且以團營爲老家無怪乎兵日耗而國日弱也 實錄曰景泰三年五月于謙等上言練兵法曰稽古陣法莫有過於黃帝破蚩尤之陣黃帝按井田作陣法大將居中專主旗鼓八部旋繞悉聽指麾若正北受敵則東北西北二陣爲奇兵張左右翼以援之其正南正東正西及四隅受敵亦如之所謂常山之蛇首尾中俱相應也其以常山言者常山爲北岳大將居北岳元武之位也自古如太公望孫武子韓信諸葛孔明李靖數人深明此法其名曰天地風雲龍虎鳥蛇者則孔明也蓋孔明按洛書之數以名之九數居離南方朱鳥七宿之地前朱雀也故曰鳥陣一數居坎北方元武七宿之地後元武也故曰蛇陣三數居震東方蒼龍七宿之地左青龍也故曰龍陣七數居兌西方白虎七宿之地右

白虎也故曰虎陣六居西北乾之位也乾爲天故曰天陣二居西南坤之位也坤爲地故曰地陣四居東南巽之位也巽爲風故曰風陣八居東北艮之位也艮爲山山出雲故曰雲陣大將居乎中五則又所以象乎太極也一大陣之中有八陣而八小陣之中又各有八陣大陣法八卦小陣法六十四卦臣等欲將陣法教演軍士謹繪圖上進勅令依法訓練勿事虛文

臣等謹按兵志云給事中鄧林進軒轅圖卽古八陣法蓋卽實錄所載謙等上言之陣法是也昭代典則大政紀皆云給事中鄧林在兵科見團營軍無統制每出征人馬多雜沓致死効其操練不如法當國者遂以事委之林乃用此陣教閱隊伍始整人以爲便

英宗天順元年四月罷團營 罷團營仍三營舊制閱營軍二十三萬有奇定爲頭撥次撥以時訓練

四年六月罷忠義營 先是石亨請以招募報効子弟立營訓練至是總兵官言其逃亡者多不堪立營命罷之 以其餘兵分撥五軍等營

八年春時憲宗已即位復立團營增爲十二 時命總兵官孫繼宗同本兵馬昂選頭撥官軍十二萬人分營操練至成

化二年復罷命分一等次等訓練三年二月命馬昂與都御史林聰清理其役占等弊選得一等軍十四萬三千九百有九人帝以數多於四月仍分十二營而區其名有奮耀練顯四武營敢果効勇四勇營立伸揚振四威營中各分五軍三千神機五軍領內外副步官軍三千領內外馬隊官軍命侯十二人掌之各佐以都指揮監以內

臣提督以勦臣名其軍曰選鋒不任者仍爲老家以供役而團營之法又一變

臣等謹按實錄三年之分十二營時馬昂議抽京衛驍健八萬外衛八萬外衛分二班以瓜代故京衛共十二萬

分爲十二營也其京外衛並三大營精兵共二十五萬分爲春秋二班團操聽征三大營總兵每月二次赴團營會操仍令內臣協操此十二營雖名爲選鋒而其實仍卽團營也馬昂林聰旣清理在京之營已而兵部尙書王復請在外衛所亦當清理私役跟官辦納月錢索要財物逼迫賣放諸弊每年一次查考亦允行之

憲宗成化八年正月簡閱馬步官軍 命提督內官裴當撫甯侯朱永定襄伯郭登通閱各營馬步官軍凡馬軍之貧弱者退爲步軍步軍之精壯殷實者補爲馬軍其把總官亦選易之

十年八月易置諸軍營教場 初五軍營教場在德勝門外以爲狹不能容而三千營教場地廣兵少因兩易之後增團營爲十二又以大教場與團營而五軍營暫就錦衣衛教場其地愈狹英國公張懋等乃復請與三千營易置之

十四年正月定寒暑官軍歇操例 南京守備奏擬官軍寒暑條例下兵部議以每年俱於二月八月起操至五月十一月大暑大寒而止其歇操之時仍十日一赴教場點視從之

十九年八月勅戶部尙書余子俊會官閱視團營官軍 時邊警日亟以定西侯蔣琬言命太監懷恩及子俊會官閱視賜勅行事已而奏上所閱之數共一十六萬八千有餘且言兵戎國之大事近來上下徇私不以爲重今旣閱實分爲頭撥二撥頭撥專一在營屯操遇有急切工役止於三大營量撥次撥官軍勿得擅動團營阻壞軍法從之

臣等謹按天順時每親閱射於西苑成化九年亦仿行之茲不備錄蓋因土木之變稍以兵事爲重也

孝宗弘治元年六月命都御史馬文升提督團營 京營操練舊以文武大臣協同提督後止用武職鴻臚少卿

李鑑以爲言命文升蒞其事

九年六月申明洪永操法 兵部尙書馬文升等奏飭武備請勅團營提督諸臣依期操練遵舊法五日之內二日走陣下營三日演武又言斬馬長刀所以摧鋒破敵京營原無師授請令陝西鎮巡官揀選諸曉馬步刀法者二十四人分撥十二營教練待用從之

十年十月揀選操練禁軍 兵部尙書馬文升等言臣觀歷代兵制不使權歸於一人漢制有南北軍南軍護守皇宮禁衛之兵也北軍拱護京師征討之兵也各有所掌而南軍則託之心腹太祖高皇帝制十六衛親軍指揮使司不隸五府爲禁兵卽古之南軍也其他衛俱屬五府以備征討卽古之北軍也永樂中復設親軍指揮使司十二衛又選天下衛所官軍年力精壯者及塞外走回男子收作勇士常數千餘人俱屬御馬監更番上直委心腹內外官統領其盔甲器械俱異他軍成化以來勇士精壯者少其數乃至九千之上每郊祀駕出勇士盔甲與各營無異禁兵漸至廢弛此外雖有將軍圍子手不過於早朝侍衛退朝卽散皇城之內防姦者無幾其守衛皇城各門官軍尤疲羸至不任受甲宜勅御馬監掌印內臣提督太監將見在勇士並四衛操軍揀選仍勅守衛官常嚴部伍分番上直稽察出入以防微銷萌命如言行之然亦未能有所整飭

十四年二月選騰驤四衛精壯軍操練 先是兵部嘗請以錦衣衛及騰驤等四衛軍旗勇士校尉六萬八千餘人選補團營之缺爲內臣所阻是歲邊警命會議守禦之策兵部言四衛官軍餘丁原無差役請選其精壯一萬居常操練從之 兵志曰四衛軍往往爲中官占匿先是弘治末勇士萬一千七百八十人旗軍三萬一百七十人歲支廩粟五十萬孝宗納廷臣言覈之又令內臣所進勇士必由兵部驗送乃給廩五年稽其人數著爲令省

度支金錢歲數十萬

十八年十一月時武宗已即位選五軍三千營精銳歸團營操練 英國公張懋兵部尚書劉大夏言奉勅簡閱十二營

見操官軍得精銳者僅六萬五百餘人分爲五營稍弱者二萬五千人各存原伍一體操練甚不堪者二百餘人發回次撥給事中葛嵩等請三千五軍等營無執事精銳者俱選送團營操練其有執事者存八萬餘人以供役請將隱占多役之數一體揀選兵部覆議從之已而爲惠安伯張偉謬引舊制以爭事遂已隱占如故

武宗正德三年七月嚴幼官舍人操練之例 英國公張懋言旗手等衛官實二萬三千七百有奇而見操官舍並在逃者較之官數纔十二乞會官清查送操但年十七以上者必送營差操而後聽其襲代或隱而不報報而不送者俱如例參究已送而三逃者降祖職一級從之

七年十月選團營官軍操練討賊 內官張永奉勅揀選團營官軍得十二萬三千七百餘人因請精選二千爲正兵又每營各選三千爲奇兵共四萬二千人

臣等謹按武宗時兩官廳操練之事已詳兵制是年宣府軍與京軍互免大學士李東陽等上疏陳十不便皆不聽是後外四家軍依憑威籠市里畏而避之實錄曰工部給事中潘垣疏言古者五大不在邊五細不在廷今有警則調邊將邊兵此倒持之勢也臣愚以爲宜如景泰天順間添設都御史一員專理京營戎務兵部會同閱視將領各以所部教習多寡爲優劣而賞罰之年終大閱則仿洪武間御前試驗之例以警其惰至於將軍營四衛亦各操練而大司馬及都御史舉得以綜核之公侯伯等官及勳衛等年二十五以下者送國子監都指揮等幼官及嗣子送武學仍每月定期演習弓馬會操之日一體考驗年終行賞或有可以爲將者不次擢用其怠於進

者重罰之南京則責操江都御史以營務軍士亦乘暇教習南北直隸各省則遣科道官或卿佐等官分行整理三司等官朔望會操其幼官及應襲子孫亦送學習教而舉其能者如此則禁旅鄉兵皆有實用安假邊兵而示人以弱哉兵部謂其言切當可行云

十二年八月留鳳陽秋班本處操備 先是巡按御史陳傑言鳳陽八衛原額軍四萬六千六百餘今僅萬二千六百餘除各項差役守城者僅老弱百餘人大非厚本之道乞暫免京操剗革雜役部議不允至是以水災故留之

世宗嘉靖元年四月命各邊巡按御史三年一閱軍馬器械

三年四月選練團營官軍

六年十二月定下營操練之法 凡遇該操之時提督官照常大操三日坐營官小操二日凡下營布陣不必拘泥古法止照常用三疊陣及四門方營其武藝勿止以弓箭爲長技每營選箭手刀手槍手牌手銃手各一二人爲教師轉相教習又更營制分兵三十枝設將三十員各統三千人訓練擇精銳者爲選鋒厚其賞總督大臣一月會操者四餘日營將分練協理大臣及巡視給事御史隨意入一營校閱賞罰因以擇選鋒帝又置內營於內教場練諸內使

十三年八月免皇陵衛官軍京操 巡按御史李禔言河北之軍有京操而無漕運江南之衛有漕運而無京操

獨鳳陽衛軍且運且操勞苦爲甚且陵寢及高牆皆在其地而又無城池之限其見在巡守者僅二千人耳卒然有警誰與禦之請減鳳陽等八衛京操官軍三分之一以備緩急事下兵部請以皇陵一衛軍盡留本衛操守七